

Date – 23/08/2024

Time - 7:30 -7:40Hrs

**REGIONAL NEWS BULLETIN**

**HEADLINES (MORNING)**

1. **Kolasib District paltlang National Highway dan chah chhonzawm a ni.**
2. **Aizawl District-ah zirna in te a ni li nan vawiin hian khar chhonzawm a ni.**
3. **Prime Minister Narendra Modia chuan vawiin hian Ukraine khawpui Kyiv a thleng dawn.**
4. **Kolkatta-a hmeichhe doctor pawngsual leh thah anih avanga Delhi-a doctor inzawmkhawm pawlte chuan nimin khan an nawrhna an titawp.**

<><><>

**KOLASIB ROAD BLOCK**

**Kolasib District a lirthei neitu leh Driver pawl hrang hrang pangaten Vairengte - Sairang leh Bairabi - Kolasib inkar Kawngpui -National Highway dan chah mekah boruak duhawmlo thleng a awm hriat a ni lova,**

**Vawiin a ni 2-na turin Kawngpui dan chah hi kalpui chhonzawm a ni a, Puan tawh angin nimin khan Kolasib DC Pu Robert C. Lalhmangaiha chuan a pisa ah Kolasib District MJA hruaitute kawm in, an hmalakna hrang hrang a hrilhfiah a. DC chuan, Sethawn (RTP farm bul) leh Kawnpui Quarry bula Kawng chhe zual lai siam that anih theih nan a hma an lak dan te sawiin, Kawngpui chhe zual lai hi ni 15 chhunga siam tha vek turin NHIDCL hotute leh Contractor te hriattir annih tawh thu a sawi a, an hmalakna ngai chang a, an beisei anga an siamtha lo anih chuan tun aia na in Contractor leh NHIDCL hotute nawr leh anih tur thu a sawi. Hetianga hmalak anih avang hian Road Block huaihawttute chu an thil kalpui mek chu mipuite hmakhua ngaihna avangin titawp se a duh thu a sawi.**

**DC chuan, Kawngpui chhe zual lai siam dan thli thlai a, a tul anga a hmuna endik leh viltu tur Working Group din anih tawh thu leh chu Working Group chu Pu H. Lalramliana, Kolasib SDO (S) kaihhruaina hnuaiah din anih thu a sawi a. Tun dinhmunah Kawngpui chhe zual lai thawm that chu an ngaih pawimawh ber anih thu a sawi.**

**Kolasib District MJA member te a kawmna ah hian DC hi SP Pu David H. Lalhangliana; DRDO Project Director Pu Lalmuan Puia; SDO (S) Pu H. Lalramliana; DLAO Pu ST Lalhmingmawia leh DIPRO Pu David A. Lalhmingchhuana ten an tawiawm a ni.**

<><><>

## SWEARING IN

Mizoram Lok Ayukta Member thar Pu Joel Joseph Denga leh Mizoram Public Service Commission member thar Pu K Lalhmingliana te chu nimin khan Governor Dr Hari Babu Kambhampati an rinawmna thu tiam tirin a lalut a. Mizoram Lokayukta Judicial Member ruat thar Pu Joel Joseph Denga hi MJS Retired niin MPSC Member ruat thar Pu K. Lalhmingliana hi MCS Retired a ni thung.

Laklulh inkhawm Raj Bhavan-a neih chu Chief Secy Dr Renu Sharma in a kaihruai a, Mizoram Lok Ayukta Member leh MPSC Member thar laklulhna Inkhawmah hian Chief Minister Pu Lalduhoma a tel a. Speaker Pu Lalbiakzama, Cabinet Minister te, Minister te, MLA te leh mi pawimawh dangte an tel a ni.

Lokayukta Judicial Member thar Pu Joel Joseph Denga hian thiamna lamah BA, LL.B degree a nei a. Kum 2011 khan Mizoram Judicial Service-ah a lut a, Law & Judicial Department hnuaiyah hna pawimawh tak tak a thawh hnuin kum 2018 khan District and Session Judge-ah a kaisang a, Lok Ayukta Judicial Member atana ruat a nih lai hian District and Session Judge, Aizawl hna a chelh mek a ni.

MPSC Member thar Pu K.Lalhmingliana hian BSc (Hons) degree a nei a. Kum 1998 khan Mizoram Civil Service (MCS) ah a lut a, MCS Junior Grade, Senior Grade leh JAG a nih laiin Mizoram hmun hrang hrang leh department hrang hrangah nihna pawimawh tak tak chelhin a thawk kual tawh a. MPSC Member thar atana ruat a nih lai hian Municipal Commissioner, AMC hna a chelh mek a ni.



## RAIN H AVOC

Aizawl District-ah zirna in te a ni li nan khar chhonzawm a ni a, Dist Disaster Management Committee Chairman, DC Pu Lalhriatpuia chuan zirna in khar a nih tut thu hi tichhuakin, Khawcheng karah naupangte an him zawk nana hmalakna a ni a ti a. Indian Meteorological Department khawchin hlirlawkna ngaihven reng chungin leh dist chhunga ruahsur nasa kaihnawih chhiatna hrang hrang thleng thei laka naupang himna ngaihtuahin he thupek hi chhuah a ni a ti.

Kar 1 vel khawcheng hian Aizawl Dist ah chuan khawsak phung a ti khaihlak hle a ni.

Hetihlai hian, Dist dang Lunglei leh Kolasib ah te pawh nimin khan zirna in khar a ni a,

Lungleia kan corr sawi danin Lunglei chheh vel Buarpui tlang dung panna kawng te pawh a diak hle a, nidanga darkar 2 vel lek a an thlen thinna chu darkar 4/5 dawn hun hman a ngai a ni.

**Ruahsur avang hian chhiatna liantham thleng awm lo mahse lungrem chim leh khawi amaw laiah kopang min hlek hlek chu a awm ve nual a, Lunglei bazar vengah pawh kopang minin a thlang a in luhka a ti chhia a ni.**

<><><>

#### **AMC WARD VI BY ELECTION**

**Aizawl Municipal Corporation (AMC) Ward No. parukna by – election chu nimin khan tuang taka neih a ni a, vote zaa 47.38 a tla a ni.**

**He inthlanah hian Polling Station 10 ah vote thlak niin, vote nei 9901 - mipa 4601 leh hmeichhia 5300 an awm a, vote tla hi zat hi 4691 a ni a, mipa 2170 leh hmeichhia 2521 in an thlak a ni. Vote tla te hi ni 26 khian chhiar a ni ang.**

**Aizawl Municipal Area huam chhunga Ward No. VI corporator ni lai thih avangin seat ruak hnawkhah nan By-Election hi neih a ni a, candidate pathum awmin ZPM candidate H. Lalremtuanga, Chamari West, BJP candidate Chawngmingthanga Zarkawt, leh independent candidate Lalrinfeli Chanmari West te an ni. Ward No. VI huamchhungah hian Chanmari West, Edenthlar Veng leh Hunthar vengte an awm a ni.**

<><><>

#### **SAITUAL ROAD**

**NHIDCL enkawl, National Highway 102B Manipur State chhun tur, Saitual leh Hliappui inkar kawng chhe lutuk leh lirthei veivakten harsatna an tawh thin chungchangah nimin khan Saitual Bawrsap Dr. Lalngura Tlau hovin Contractor leh Official te an thukhawm a.**

**Bawrsap chuan Contractor te chu tun ai nasa tan la tur leh kawng zawhtu mipuite harsatna thlen lo thei ang bera hma la turin a chah a.**

**Thutkhawmah hian NHIDCL hnuai Saitual leh Keifang inkar kawng siam that tura ruahmanna awmsa te sawiho a ni a, Contractor te hnen atang fur zawha hmalak an tum dan te ngaihthlak a ni bawk.**

<><><>

#### **LAWNGTLAI E POS**

**Lawngtlai DCSO hnuai Fair Price Shop te chuan Internet chhiat avangin Electronic Point of Scale (e-POS Machine) hmanga mipui te buhfai pekchhuah kawngah harsatna an tawk a.**

**Hemi chungchang hi DCSO Lawngtlai chuan Sawrkar thuneitu te hnenah thlenin tun dinmun ah Western zone ah Retailer 74 leh Eastern zone ah Retailer pakhat chu Offiline Mode a buhfai semchhuah Sorkarin a phalsak a ni.**

**Lawngtlai District hi Sangau RD Block huam chung Eastern Zone, Central Zone Lawngtlai leh Ngenpuithlang lam Western zone angin a then theih a, Ngengpui thlang Western zone ah Internet signal a thatloh vangin Retailer ten e-POS Machine hmanga buhfai semchhuah ah harsatna an tawk nasa hle a ni.**

DCSO Pu Lalrinsanga chuan Central Zone Lawngtlai leh a chhehvel bakah Eastern Zone Sangau RD Block huamchhung ah Online Mode a buhfai pekchhuah ah Retailer ten harsatna tawh mahse, e-POS Machine in Internet signal a man that zawkna Retailer ten an hriat chuan sim card thlak phalsak an ni a, thuneitute hriatpuina tel loa mahni thu a thlak erawh a rem lo a ni a ti.

<><><>

SAFA APNAO

Kolasib Dist Bairabi ah Office chuan sorkar laipui hmalakna Faina beihpui- 'Safai Apnao, Bimaari Bhagao Campaign' neih ani a

Nimin khan Bairabi SDO(Civil) Office chuan he Campaign' hnuai hian Special Cleanliness Drive on Garbage Vulnerable Areas tih thupui hmangin Bairabi Rel station Platform a bawlhhlawh paih thinna hmun an thian fai.

He campaign hi Bairabi Joint Village Council Chairman Pu R. Lalrinawma chuan kaihruiin, Bairabi khawtlangin UD&PA department buatsaih Mizoram khawpui fai inelna ah lawmman an lo lak tawh thu a sawi a. Faina beihpui thlakna tur campaign buatsaih leh ani chu lawmawm a tih thu a sawi.

Bairabi SDO (C) Pi Josephine Zonunsangi, Kolasib DUDO ni bawh chuan SABB Campaign hi sorkar laipui Ministry of Housing & Urban Affairsin ram pum ah kalpui tura a tih angin kalpui anih thu a sawi a, fur lai in India ram pum ah kawthalo a tam thin a, mahni in leh a vel tihfai loh avanga natna kai theih dan leh kawthalo natna a thlen theih dan te tarlang in, mitin in faina kawnga hmala thar leh turin a chah.

Hnatlangah hian Faina Thutiam sawirual a ni a, Bairabi North leh South VC member te, tlawmngai pawl hrang hrangte leh Rail Station bula cheng mipui thahnem tak an tel ani.

<><><>

PM

Prime Minister Narendra Modia chuan vawiin hian Ukraine khawpui Kyiv a thleng dawn a. India Prime Minister zingah Ukraine tlawh hmasa ber a ni ang.

Pu Modia hian Kyiv-a a cham chungin Ukraine President Volodymyr Zelensky nen an inkawm ang a, Ukraine buaina chungchangte an sawipui rin a ni.

Prime Minister Narendra Modia nimin khan Warsaw khawpuiah Poland Prime Minister Donald Tusk a kawm a. He hunah hian ram pahnihte chuan an thawhdunna chu tilianin strategic partnership-a tihsan an remti. Pu Modia chuan thuchhuah siamin kuminah India leh Poland te hian an thawhdunna kum 70-na an thleng a ti a. India leh Poland inkar chu mipui rorelna democracy leh dan rorelna duhna avangin a tha em em a ni a ti.

<><><>

DOCTOR STRIKE

Kolkatta-a hmeichhe doctor pawngsual leh thah anih avanga Delhi-a doctor inzawmkhawm pawlte chuan nimin khan an nawrhna an titawp. Delhi-a Doctor nuarte zingah hian Resident Doctors' Associations of Central Government Hospitals, All India Institute of Medical Sciences, Dr. Ram Manohar Lohia Hospital, Safdarjung Hospital, leh Lady Hardinge Medical College-a thawk doctor te an tel a. Supreme Court in he pawikhawihna a ngaihtuah nghal leh hma a lak nghal avangin an nawrhna hi an titawp tih an sawi a. RG Kar Meical College-a pawikhawihna thleng leh rampuma healthcare lama thawktute himna lam ngaihtuaha Supreme Court in hma a la chu lawmawm an tih thu an sawi a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestre am a ni ang.

<><><>